

# Seizneix Vunz Baenzlawz Ngeix

Seiz gou lij iq, gingciengz dingq bohmei gangj haujlai gojgaeq, dingzlai dwg gojgaeq coengh vunz ndaej sim angq.

Lumjnaeuz, miz daxbuz geq ndeu youq gyang roen miz ci baeae dauqdaug haenx laemx lo, miz daegmbauq ndeu gipmuengz gvaqbae rex de hwnj-daeuj, bouxshgih raen le hix bouxboux daengx ci lo……

Seizneix, langh miz vunz raen boux daxbuz geq ndeu laemx youq gwnz roenvunzbyaij, mboujdanh mbouj miz vunz bae rex de hwnjdaeu, vanzlij yawjsiuj de dem. Lij miz vunz hai soujgih ingj sibinz, vanzlij naeuz neix dwg de yaeuh vunz bw. Neix daxbuz geq naj bienq baenz youh hojlienx youh mbouj miz banhfap, mbouj miz byawz coengh de, neix vihmaz baenzneix ne?

Youh lumjnaeuz, miz vunz gip ndaej aen daehcienz ndeu, youq dieg gip ndaej haenx caj le baenz ngoenz bae, langh bouxlaw daeu ne, couh gyau hawj bouxlaw, langh bouxlaw mbouj daeu, couh gyau hawj gingcaz, liuxle cij baema lo.

Seizneix, geij ngoenz gonq gou raen boux ndeu youq henz roen gip ndaej mbaw 100 maenz ndeu,

bouxde yawj doeng yawj sae, rox vunz mbouj raen de gip ndaej ciengz, couh gipmuengz coq haeuj ndaw daeh de bae, deuzbae vaiq dangqmaz. Gaej gangj gip ndaej ciengz mbouj caj bouxlaw, mizdi vunz vanzlij caeg ciengz, duet ciengz, neix vihmaz baenzneix ne?

Vanzlij miz gojgaeq gvendaengz gaujvaq ra ngaiz, boux gvaq roen cungj daraen hojlienx de, mizdi vunz hawj ngaiz, mizdi vunz hawj ciengz, vanzlij mizdi bouxmiz sou haujlai gaujvaq nyez youq roengzdaeu.

Seizneix, haujlai vunz raen gaujvaq le cungj dang da mbouj raen ne, neix hix mbouj ndaej gvaic boux gvaq roen caez, miz mbangj dwg bouxyaeuh, vuenh le ndangdaenj boengqbangq, daegdaengq cang boem youh luenh youq gyuek, gyajcang baenz gaujvaq, yaeuh bouxsim, unq aeu ciengzaiz……

Ai, seizneix vunz sim bienq lo, caeuq boux ndaw gojgaeq bohmei gangj haenx mbouj doxdoengz lailai bae, seiqgyaiq cungj bienq, bienq ndaej vaiq dangqmaz bae. Hoeng vihmaz simvunz mbouj bienq ndei lai vaiq di ne? Vihmaz mizdi vunz yied bienq yied ca ne? Gou ngeix mbouj doeng lo!

(Danz Gwngiyenh)



## Gojgaeq

Gou gyaenz dingq daxboh gangj gojgaeq dahraix, aenvih gij gojgaeq daxboh gangj de mizyinx raixcaix.

Daxboh guhlawz miz doenghgij gojgaeq mizyinx de lai baenzneix ne?

Daxmeh lwnh gou dingq: Boh yawj gvaq haujlai saw go! Doenghgij gojgaeq mizyinx neix cungj dwg ndaw saw raiz miz go!

Gou heuh daxmeh ce doenghgij saw neix hawj gou, gou majhung le, goj yaeq doeg doenghgij saw raiz gojgaeq neix. Hoeng daxmeh naeuz, doenghgij saw neix deng vunz aeu bae coemh liux lo.

Vihmaz coemh doenghgij saw neix liux bae ne?

Daxmeh yienghneix naeuz ndwi: Lwg ha, gaej cam lo, seizneix mwngz lij caengz rox; gaejlaeg bae cam boh, cam de de couh mbouj angq lo.

Couhdwg aenvih gou seizneix lij caengz rox cij yaeq cam go! Meh vihmaz mbouj ngah lwnh hawj lwg

dingq ne? Vihmaz lij mbouj hawj gou bae cam boh dem ne? Gij saeh saw boh mbouj angq de, lwg coj mbouj bae cam dahraix go.

Vihmaz yaeq coemh doenghgij saw raiz gojgaeq neix bae ne?

Dwg mbouj dwg miz vunz mbouj gyaenz doenghgij gojgaeq neix ne? Hoeng, doenghgij gojgaeq neix miz-yinx baenzneix, gyoengqde vihmaz mbouj gyaenz ne?

Dwg mbouj dwg aenvih gyoengqde yak lumj duzguk, rwix lumj duzmanaenz, vaddaeuz lumj duznyaenma, yakyawj lumj duzroega ndaw doenghgij gojgaeq neix, gyoengqde mbouj gyaenz doenghgij gojgaeq neix, couh coemh doenghgij saw raiz gojgaeq neix bae ha?

Caeklaiq daxboh lij geiq ndaej doenghgij gojgaeq neix, gou goj yaeq geiq doenghgij gojgaeq boh gangj neix maenhdetdet bae. Daengzcog, gou goj miz lwg le, gou goj gangj doenghgij gojgaeq neix hawj lwg gou dingq. Lwg gou majhung le, goj miz lwg le, lwg gou goj gangj doenghgij gojgaeq neix hawj lwg de dingq. Aenvih, doenghgij gojgaeq neix cungj mizyinx lailai.

(Daj 《Bonjsei Sim Lwngnyez》  
(Veiz Gizlinz raiz) senj okdaeuj,  
Lwgfwnzgmeh/卢奋长 hoiz)

## Boux Baengzyoux Ndei Gou“Vahvah”

“Vahvah” dwg boux baengzyoux ceiq ndei gou.

De ndang daemqdetdet, biz-bwdbwd ne, daengx ndang hwnj rim bwnhau caeuq bwnndaem, unq-nemnem, wenjlili, byawz raen cungj yaeq lumh mbat ndeu. Vahvah aen gyaenz nduenndindi, gwnz haenx miz fouq rwz samgak ndeu, langh bangxhenz miz maz ningdoengh, rwz de couh daengj sohsoh hwnj-daeuj. De doiq lwgda ronghliklik, banhaemh vanzlij rongh bw! Vahvah baihlaeng ndang miz geu rieng youh iq youh raez ndeu, ciengzseiz bi bae bi dauq mbouj dingz mbouj duenh, ndaeng- gon dangqmaz.

Vahvah ceiq maij caemz giuz-bwnyungz. Miz ngoenz ndeu, gou raen de bomq youq gwnz namh yiengh naiq lai, couh bae doj de. Neix gou dawz aen giuzbwnyungz daeu caemz, de raen le, couh gaenj hwnjdaeu, soh dingj gyaep aen giuzyungz, lumj naeuz: “Aeu giuz-bwnyungz hawj gou, vaiq di hawj gou!” Gou dawz giuzbwnyungz gaem

maenh bi bae bi dauq, yaep bi haeuj baihsuix, yaep bi haeuj baihgvaiz, mbouj hawj de gaemhdawz, neix le de lumjnaeuz hozndat lo, de baez heuh “meuh” sing ndeu, youh bomq gwnz namh youq, lumj naeuz: “Hw, mbouj leix mwngz!” Gou raen de hozndat lo, couh aeu giuzbwnyungz hawj de, Vahvah dauq gaenj hwnj-daeuj lo, sim mbouj miz maz fanz lai lo.

Vahvah dwg duzmeuz ngahgwn damgwn dahraix, baez raen gou gwn ngaiz, de couh maeuq youq henz ga gou myaiz lae mbouj dingz bae. Gou nip gaiq nohbya ndeu vit hawj de, de raen le, gikdoengh dangqmaz, buet bae coh gaiq nohbya, gaemdawz gaiq nohbya le, song ganaj gaemhdawz gaiq nohbya maenhmaenh bae, lauhei q deng bouxwnq dued bae. De doq gwn ndaw bak doq oksing “vuhvuh”, lumj naeuz: “Ndeigwn lai, ndeigwn lai!”

Duz meuz iq ranz gou dwggyaez mizyinx dangqmaz, dwg lwi?

(Vei Yingzyingz)

